

兩
浙
名
賢
錄

兩浙名賢錄卷五十四目次

寓賢

宋二

敷文閣待制曾吉甫幾

兄開附

右司郎官張彥亨震

馮熙績成

孫彥珍附

黟縣令陳伯和塤

左司諫馬伸

大理司直賈子野廷佐

知和州陸子高峻

吏部尚書汪聖錫應辰

大理丞何叔遠彥猷

子伯臨附

兵部尚書宋嗣宗延祖

進賢令程可久迥

子綢孫仲熊附

戶部尚書蔡子平洸

王性之鉅

翰林學士綦叔厚崇禮

參知政事范致能成大

資政殿學士弁子才

子獻附

刑部侍郎楊宜之

子義附

潮州守徐德操定

秦州知州輔達

國子監祭酒王元石介

觀文殿學士李長孺魯伯

德清丞方智善淑

防禦使孟德夫宗政

周昭禮輝

禮部侍郎洪芹

參知政事高不妄斯得

右文殿修撰焦濟甫炳炎

弟煥
炎附

敷文閣學士言宗文通

顯謨閣學士劉德修光祖

端明殿學士王仲行希呂

刑部尚書程季與公許

參知政事楊元極棟

虞士宋斌

周子受祐

國子正鄭宗仁樸翁

端明殿學士家鉉翁

謝臯羽翺

資政殿學士文時學及翁

元

禮部尚書謝叔敬昌元

子大椿附

南坡老人戴仲文時才

監察御史幹勣海壽

太常鮮于伯機

劉師魯汶

劉洩附

夷門老人杜行簡敬

張潞公仲舉翥

翰林學士貫酸齋雲石

教授敖君善繼翁

集賢直學士鄧善之文原

福寧尹王伯敬簡

妻潘氏子相楨附

洛下遺民郭彥澤

戶部尚書貢泰甫師泰

族子友初附

馬從事易之

侍儀舍人陳雲嶠柏

縵叔彝倫

孝子張端

可閒老人張光弼昱

薩都刺天錫

丁雀年

李原善善

柳開達世聞

明

兵部尚書溫祥卿

戶部侍郎高季迪啓

國子監助教李宗表畢

貢友初性之

太常張來儀羽

太常少卿高士敏異志

文淵閣待詔陳中復遠

監察御史桑仲修慎

戶部員外郎邵伯正

知雲南縣高彥高岳

會稽二無名氏

赤松山農金元玉琮

鄧吏部林

行人司副唐子迪志大

太白山人孫太初一元

工部尚書劉元瑞麟

袁武選永之表

行人薛尚謙佩

孝豐知縣施以德懋

兩浙名賢錄卷之五十四

東海徐象梅仲和氏誤

武原朱祖昌令回氏閱

寓賢

宋二 共四十六人

敷文閣待制曾吉甫幾 兄開附

曾幾字吉甫，贛州人。以兄弼恩起將仕郎，累官敷文閣待制。立朝敢諫，負氣不阿。嘗三仕嶺表，家無南物。晚節猶重於人，雖儉邪如湯恩退，亦以不得從游爲恨。早從

舅氏孔文仲弟兄講學時諫官劉安世以黨禁人無敢
窺其門者幾獨與之往還避地衡岳又與胡安國游故
其學益邃爲文雅正尤工於詩有經說文集各若干卷
幾初與兄禮部侍郎開徙家河南紹興末因官浙東卜
居於越寄禹蹟寺中未幾其子浙西提刑逮迎養於官
卒平江歸葬山陰之鳳皇山下詔贈左光祿大夫謚文
清

右司郎官張彥亨震

張震字彥亨魏公浚五世孫自綿竹屢徙居歛乾道已

丑登進士歷院轄寺丞知撫州江西倉以不附韓侂胄罷歸嘉定初召爲郎遷右司郎官奉祠不復出時論以正人目之震娶會稽魯文清公女其子遠猷後爲紹興太守因家於越

馮熙績成 孫彥玠附

馮成字熙績滑州白馬縣人太史中書令魯國勳威公守信之孫也建炎間扈駕至溫州遂居永嘉德政鄉嘗賦詩云扈蹕東來到永嘉南燕萬里盡平沙粉身碎骨死無恨願拓中原報國家岳飛素奇之羅致屬幕屢與

兀術戰獲捷立功收復州縣每念魯公以必死報國高
宗書嘉忠二字賜之遂以嘉忠名堂誓曰吾家清野久
矣今何面目行白日下使成不能滅虜報國者辱祖不
忠不孝當自殞於斯堂時高宗賜岳軍旗曰旌忠而報
以嘉忠名堂故虜有二忠將軍萬死不可親之謠飛旣
以冤死成遂滅跡人間以琴書自娛號湖山居士及卒
樞使劉珙以詩挽之有武穆英賢友勤威忠孝孫之句
孫彥珩博學多才略有祖風宋亡入山不出以忠孝世
其家

黟縣令陳伯和墳

陳墳字伯和陽翟人澗上丈人恬之族子博學工詩南渡寓居桐廬與滕岑相唱和岑盛稱之以爲力追作者墳嘗次岑韻山居詩云解紐滄溟畔携家紫翠間地臨雙港勝天與兩年閒茅屋靜聞雨竹籬疎見山所慚隣舍老句險不容攀雙港者一名橫港卽桐溪也以紹興進上終黟縣令卒於家

左司諫馬伸

馬伸東平人政和中進士歷官左司諫有直聲建炎初

隨高宗南渡。寓家龍丘。抗疏劾黃潛善汪伯彥朋奸誤國。責監濮州酒稅。死道中。後胡安國訟其冤。請官其子孫。以旌直臣。不報。

大理司直賈子野廷佐

賈廷佐字子野。其先真定人。博學多聞。剛毅有大節。宣和二年。入太學。金人犯關。隨父淵扈蹕南渡。遂家東陽。登紹興二年進士。授桐廬簿。時金遣使張通古偕王倫南來。以詔諭江南爲名。廷佐一再上書。累數千言。劇論讐耻之。不可忘。名分之不可貶。和約之不可信。請誅王

倫拘虜使決意用兵以圖恢復其辭旨剴切大略與胡
銓同以官卑適不爲秦檜所忌幸免竄逐累官大理司
直未幾出知處州致仕卒贈朝奉大夫所著有善願集
愚齋雜著若干卷

知和州陸子高堦

陸堦字子高高郵人建炎初徙居崇德第進士教滁滁
人興起於學歷秘書省校書郎倅和州議散武定軍以
收人心攝濠州時虜猖獗人情洶洶堦開示大信濠獨
晏然散卒聞堦至受廬者數千乃悉簡爲勁兵改知和

州養士屬俗修倉濟湟功多於濠坐免歸年飢與同志
爲粥以食飢民餘萬人用是得疾卒葬縣北六里漫塘
劉宰誌其墓

吏部尚書汪聖錫應辰

汪應辰字聖錫信州玉山人五歲知讀書多識奇字家
貧無膏油每拾薪蕚以繼晷十歲能詩遊鄉校未冠首
舉鄉貢試禮部居高選紹興五年進士第一人年甫十
八耳少受知喻樗既擢第往從張九成卒業海昌所學
益進初任趙鼎帥幕召爲秘書省正字時秦檜力主和

議應辰上疏論之忤檜意出判建州遂請祠以歸寓居
常山之永年院蓬蒿滿徑一室蕭然饘粥不繼人不堪
其憂處之裕如也益以修身講學爲事浩然之氣不爲
少屈張九成請邵州交遊皆絕應辰時通問及其喪父
言者猶攻之而應辰不遠千里往吊人皆危之趙鼎貶
死朱崖扶喪過郡應辰爲文祭之衢守章傑希檜意指
應辰爲阿附死黨符移訊鞫徧搜行臺求祭文不可得
得胡寅遺檜書謂此事不足竟乃寢時檜所深忌者趙
鼎張浚既死而浚獨存未快其意將誣以不軌事并

應辰而盡去之。獄既具而槍死。應辰乃免。明年召爲吏部郎遷右司。以母老乞外出。知婺州。召爲秘書少監。權吏部尚書兼侍讀。會議太上尊號。失光堯旨。乃以敷文閣學士爲四川制置使。知成都。時大帥吳玠死。應辰遂攝宣撫之職。蜀道晏然。入覲。陛對以畏天愛民爲言。除吏部尚書兼翰林學士。并侍讀。應辰在朝多革弊事中。貴人皆側目。德壽官方斃石池。以水銀浮金鳧魚於上。上過之高宗指示曰。水銀正乏。此買之。汪尚書家上怒曰。汪應辰力言朕置房廊與民爭利。乃自服水銀邪。應

宸知之力求去遂以端明殿學士知平江府淳熙五年
二月卒於家

大理丞何叔遠彥猷

子伯臨附

何彥猷字叔遠高唐人紹興中爲大理丞秦檜誣岳飛
下獄彥猷與李若樸論其無罪万俟卨劾彥猷等黨奸
撓法輕朝廷罪在不赦罷黜寓居德清餘不溪上檜死
高宗欲召用而彥猷已卒孝宗卽位遥贈二階特命其
子伯臨爲徽州文學

兵部尚書宋嗣宗延祖

宋延祖字嗣宗，濟南人。建炎南渡，因家上虞。紹興中，登進士，尉於潛，教授廣德，除國子監主簿。嘗言：「招軍利害，又欲重湖廣，師樞孝宗甚嘉納之。」除起居郎，兼樞給事中，繳駁奏論無顧避。未幾，改諫議大夫，兼侍讀，遷兵部尚書。延祖以忠公受知，不三年而登八座，亦自謂遭時遇主，知無不言，以讜直稱卒於官。

建賢令程可久迥

子絢孫仲熊附

程迥字可久，初家寧陵之沙隨。靖康之亂，徙居餘姚。孤貧飄泊，無以自振。年二十餘，始知讀書。時喪亂甫定，四

北士大夫多在錢塘，迺得以考德問業，所造益深。專門教授，學者稱爲沙隨先生。迺尤好言易，言易者人人殊，然以沙隨爲宗。註書百有餘卷。舉隆慶進士，初尉太興，遷德興丞，終進賢令。所至皆著異政，然而不究其施。朱熹嘗以書告迺，子絢曰：「敢惟先德傳聞至行，追配古人，釋經訂史，開悟後學，當世之務，又所通該，非獨章句之儒而已。」曾不得一試，而奄棄盛時，此有志之士所爲悼歎咨嗟而不能已者。然著書滿家，足以傳世，是亦足以不朽。絢以致仕恩，調巴陵尉，攝邑事，能理冤獄。孫仲熊

亦有名

戶部尚書蔡子平洗

蔡洗字子平興化僊游人端明殿學士襄之後徙家晉川父伸左大夫洗以蔭補將仕郎中法科除大理評事出知吉州召爲刑部郎徙度支總領淮東軍馬錢糧知鎮江府會西溪卒移屯建康舳舻相銜時人旱郡民築陂瀦水灌溉漕司檄郡決之父老泣訴洗曰吾不忍獲罪百姓也卻之已而大雨漕運通歲亦大熟民歌之曰我瀦我水以灌以溉俾我不奪蔡公是賴就除司農少

卿召試吏部尚書移戶部上謂侍臣曰朕以版圖得人
爲喜洗常言財無滲漏則不可勝用未幾求去除微賦
閣待制知寧國府奉祠以歸卒年五十七洗事親孝曾
祖襄未易名力請於朝賜謚忠惠所得奉悉以振親戚
之貧乏者去朝之日囊無餘貲至弼所賜銀鞍鶴治行
人服其清潔云

王性之銍

王銍字性之汝陰人寓居剡中善屬文不樂仕進讀書
五行俱下藏書滿架銍既卒秦檜子燔屬郡將索所藏

書許官其子銍子泣拒之曰願守此書以死不願官也
煢竟不能奪

翰林院學士恭叔厚崇禮

恭崇禮字叔厚維之北海人登政和進士歷官起居郎
攝給事中召試政事堂爲制誥三篇不淹晷而就詞翰
奇偉拜中書舍人賜三品服進用之速近世未有高宗
猶以爲得之晚詔復鄒浩龍圖閣待制崇禮當行詞推
帝所以褒卹遺直之意有曰英爽不忘想生氣之猶在
姦諛以死知朽骨之尚寒同列推重御筆親除爲翰林

學士掌制誥凡五年深得代言之體尋以寶文閣直學
士知紹興府劉豫導金人入侵揚楚震擾高宗親御戎
衣次吳會崇禮以近臣承寧方面謂浙東一道爲行都
肘腋之地備禦不可不謹密疏於朝得便宜從事及奉
帝還七州宴然不知羽檄之遽期年上印綬退居台州
卒年六十六贈朝議大夫崇禮妙齡秀發聰敏絕人不
爲崖岸斬絕之行蘆儉寡欲獨覃心詞章洞曉音律酒
酣氣振長歌慷慨議論風生亦一時之英也中年頗挫
場屋晚方登第以縣主簿驟升華要極潤色論思之選

端方亮直不畏強禦奉檄罷政崇禮草詞顯著其惡無所隱檜深憾之及再相矯詔下台州就崇禮家索其稿自於帝前納之且將修怨會崇禮沒乃已

參知政事范致能成大

范成大字致能吳郡人紹興二十四年登進士第累官吏部郎出知處州處民以爭役罷訟成大爲初義役鹽家貧富輸金買田助當役者甲乙論第至二十年民便之詔頒其法於諸路除禮部員外郎兼崇政殿說書隆興再講和失定受書之禮上嘗悔之遷成大起居郎假

資政殿大學士。克金國所請國信使。圖書專求陵寢。蓋
泛使也。上面諭受書事。成大乞并載書中。不許。至燕山。
密草奏具言受書式。懷之入。初進國書。詞氣慷慨。金君
臣方傾聽。成大忽奏曰。兩朝旣爲叔姪。而受書禮未稱。
臣有疎。播笏出之。金主大駭曰。此豈獻書處耶。左右以
笏標起之。屹不動。必欲書達。旣而歸館所。金主遣伴使
宣旨取奏。成大之未起也。金庭紛然。太子欲殺成大。越
王止之。竟得全節而歸。除中書舍人。累官吏部尚書。叅
知政事。以病請閒。進資政殿學士。再領洞霄官。居武林。

城中威大素有文名尤工於詩上嘗命陳俊卿擇文士
掌內制俊卿以成大張震對自號石湖高宗嘗書石湖
二字賜之杭人重其德業因名其居側之橋曰石湖橋
所著有石湖集攬轡錄桂海虞衡集湖船錄等書行世

資政殿學士年存叟子才

子獻附

年子才字存叟井研人悅吳興山水寓居安吉州嘉定
間官史館檢閱對延英殿首陳六事三策受知理宗嘗
曰年子才好儻士夫踰年遷著作郎力辭左丞相謝方
叔右丞相吳潛交書道上意始就職兼崇政殿說書子

才隨事奏陳辭旨剴切舉朝誦其文皆曰此有德之言也兼國史院編修實錄院檢討兼權禮部郎官遷軍器少監時御史蕭泰來劾高斯得徐霖而右司李伯玉言泰來所劾不當上切責伯玉降兩官子才上疏救之不報進兼直舍人院會泰來亦遷起居郎子才羞與同列七疏力辭上爲出泰來而子才亦請去不已曰泰來既去臣豈得獨留上不允當是時伯玉降官已逾年舍人院不敢行辭子才曰故事文書行不過百刻卽爲書行以爲敎復地帝曰誦詞皆褒語可更之子才不奉詔丞

相又道帝意子才曰朕可斷詞不可改丞相欲改則自改之乃已淮東制置使賈似道以海州之捷子才草焚諭詔第述軍容之盛不言其功且語多戒飭似道不樂又言首蜀尾吳幾二萬里今兩淮惟賈似道荆蜀惟李曾伯二人而已可爲寒心謂宜於合肥別立淮西制置司江淮別立荆湖制置司且於漣楚光黃均房巴閬綿劍要害之郡或築城或增戍以守之似道聞之大怒曰是欲削吾地也時吳子聰之姑知古爲女冠得幸子聰因之以進得知閣門事子才繳之曰子聰依憑城社勢

燄薰灼以官爵爲市，縉紳之無耻者，輻輳其門。公論素所切齒，不可用。帝不得已，改子聰知澧州。待次，子才遂力辭去。帝遣檢正姚希得挽留之，不可以。集英殿修撰知太平州，未幾召對。權工部侍郎。時丁大全與宋臣表裏，濁亂朝政。子才累疏乞身歸。初，子才在太平，建李白祠，自爲記曰：白之斥，實由高力士激怒妃子，以報脫鞬之憾也。力士方貴倨，豈甘以奴隸自處者？白非直以氣凌亢而已，蓋以爲掃除之職，固當爾。所以反其極重之勢也。彼昏不知，顧爲逐其所忌。力士聲勢益張，宦官之

盛遂自是始其後分提禁旅蹀血宮庭天子且不得奴
隸之矣又寫力士脫鞵之狀爲之贊而刻諸石屬有以
拓本遺宋臣者宋臣大怒持二碑泣懇於帝乃與丁大
全合謀嗾御史交章劾子才在郡公宴及餽過客爲人
已降兩官猶未已帝疑之密以輒問安吉守吳子明子
明奏曰臣嘗至子才家四壁蕭然人咸知其清貧陛下
辨信讒言帝語經筵官曰牟子才之事吳子明乃以爲
無何也衆莫敢對戴慶炯曰臣憶子才嘗繳子明之兄
子聰帝曰然事遂解蓋公論所在雖仇讐不可廢也已

而大全敗宋臣斥誣劾子才者悉竄嶺外乃復子才官以禮部侍郎召屢辭不許陛見帝大喜慰諭者久之卽兼侍讀尋兼同修國史實錄院同修撰宋臣復有內侍省押班之命舉朝爭之不能得子才入疏詰朝帝出其疏示輔臣皆曰子才有憂君愛國之真無要譽沽名之巧擢樞禮部侍郎度宗在東宮雅敬子才言必稱先生卽位授翰林學士知制誥力辭不拜請去不已進端明殿學士以資政殿學士致仕卒贈四官官其後二人子子才事親孝弟子方客死公安挾其柩葬安吉平江守與

湖籍富民田以千餘畝遺子才皆邵之身後家無餘貲
賣金帶乃克葬子嘯大理少卿

刑部侍郎楊宜之由義

子常附

楊由義字宜之開封人家世爲將建炎初京師失守父
奉直以軍前正將扈駕至杭未幾虜復寇杭奉直捍敵
於外由義奉母避地塩官虜騎踵至母沉於河由義被
執累日而逸膺薦不第吏部朱松延請誨其子熹後以
父恩補右階監贍軍南庫隆興初盧仲賢使虜辱命由
義請行以閑門祗候克奉使趁國虜折之使拜不屈全

節而歸、換通直郎、詞曰、黑肱之爲子、木先冀獲成言之、
信、鄭衆不對、單于拜、蓋其自誓之堅、官至刑部侍郎、
朝奉大夫、卒於鹽官私第、朱熹欲銘其墓、嘗曰、忠義大、
節夷夏、稱歎會熹卒不果、子九鵬、以父任、帥襄潛、夔有、
善政、統領蜀賦、死國事、加贈五官、官其子一人、

潮州守徐德椿定

子璣瑄孫似孫附

徐定字德椿、泉之晉江人、禔弱、調處州教授、娶永嘉鮑、
氏、因家焉、知邵武縣、通判太平州、時宣州妖人胡木匠、
誘衆作亂、聚至數千人、守遁去、代者未至、盜縛一巡檢、

貫其耳以徇人心胥恐漕司檄定往攝州事定單騎馳入境下令曰汝等苦飢耳能自首者亡罪其衆立時解散胡木匠隻身遁去州境獲安遷守潮州在其子璣璵璣字致中工詩世稱四璣璣其一也終長泰令孫似孫仕至浙東帥叅宋亡劉万奴欲屠城似孫力爭獲免鄉人德之

秦州知州輔達

輔達趙州人寓居崇德乾道間爲後軍統制孝宗徵處以邊郡問其能勝任否曰當以家法治之又問何法曰

子視軍民愛惜財賦遂除知秦州語寮案曰吾目不識字手不能書但心能燭理耳能聽訟爾郡中果大治

國子監祭酒王元石介

王介字元石吳人徙家金華從朱熹呂祖謙游紹熙初登進士第三除國子錄上疏言壽皇親挈神器授之陛下孝敬豈可久闕又言婦事舅姑如事父母不可虧官中之禮不報孝宗崩介又力請上過宮執喪累疏言辭激切人歎其忠寧宗卽位介上疏言陛下卽位未三月策免宰相遷易臺諫悉出內批非治世事也崇寧大觀

間事出御批遂成此符之禍杜衍爲相常積內降十數
封還今宰相不敢封還臺諫不敢彈奏此豈可久之道
遷太學博士韓侂胄惡其切直出知邵武軍侂胄之隸
人蘓師旦忿介不通謁目爲僞黨併及甲寅廷對之語
以告侂胄有勸其自明者介曰吾髮已種種豈爲鼠輩
所使耶侂胄亦畏公議不敢發未幾以服闋補知饒州
未上召爲秘書遷度支郎時師旦已建節介與同列謁
政府遇之於庭客皆踰階而揖介獨不顧於是黨附者
劾介資淺立異奉祠歸侂胄誅召介還除右司太子舍

人兼侍講遷國子祭酒會久不用詔百官指陳缺失時
宰相史彌遠以母喪起復介手疏言漢法天地降災策
免丞相乞令彌遠終喪擇公正無私者置左右王呂熺
秦之履轍可以爲戒不報陞太子右諭德兼樞中書金
人繳駁不避樞貴張允濟以闕職爲州鈐介謂此小事
而用樞臣例破祖宗制不可不封還詞頭丞相語介曰
此中官意介曰宰相而逢中官意嚮給舍而奉宰相風
旨朝廷紀綱掃地矣居數日除起居舍人介奏宰相以
私請不行而托威福於官禁樞且下移謹敢以忠告陛

下者力乞補外以右文殿修撰知嘉興府以疾奉祠卒
年五十六贈中大夫寶章閣待制謚忠簡子瑩自有傳
德清丞方智善淑

方淑字智善祥符人紹興初舉進士爲德清丞愛其溪
山之勝遂家焉以持論平正不附秦檜意有罷

防禦使孟德夫宗政

孟宗政字德夫隨州人扈蹕南渡家於歸安開禧初金
將完顏董犯襄郢宗政率義士據險邀擊奪其輜重宜
撫使吳玠奇之補秉義郎京西提轄駐劄襄陽金人犯

境宗政與統制扈再興陳祥分爲三軍，設三伏以待之。賊血以戰，金兵敗走，尋報棗陽圍急。宗政午發，峴首，明抵棗陽，馳突如神。金人大駭，宵遁。捷聞，差權棗陽軍。初視事，一舍中見犯新令，立斬之。軍民股栗。於是築堤積水，修治樓櫓，簡閱軍旅，未幾而金酋完顏賽不墜步騎圍城。宗政與再興合兵角敵，歷三月，大小七十餘戰。宗政身先士卒，金人戰輒敗，忿甚。周城開濠，四面控兵，列濠外飛鋒以鉤鈴自警。鈴響則大吹，宗政厚募壯士，乘間突擊，金人不能支遁去，賜金帛，轉武德郎。次年，金

帥完顏訛可復擁步騎薄城宗政募砲手擊之一砲輒
殺數十人金人乃選精騎二千號弩子手擁雲梯天橋
先登又募鑿銀礦石工晝夜陷城運茅葦直抵圍樓下
欲焚樓宗政隨方禦之不得逞金人又摘彊兵披厚鎧
氈衫鐵盾而前又濕氈衫濡革蒙火山覆以米雪擁雲
梯徑抵西北圍樓登城中軍以長戈春其喉殺之敢勇
城軍自下夾擊自昕至夕金兵墜死炯炯者無算梯橋
盡燬金人連不得志俄乘順風渡濠飛脂革燒戰棚宗
政率將士血戰凡十五陣矢石交下金兵死者千餘弩

子手十死七八射其都統殪之天反風金人愈憤砲愈急會王大任統銳卒一千冒重圍轉圜入城內外合勢士氣大振買勇入金營自晡至三更金人橫尸遍地詎可奔帳走獲輜重牛馬以萬計捷聞朝廷方錄前戰守功陞武功大夫兼開門宣贊舍人制置司以湖陽縣迫境金兵檄宗政圖之宗政一鼓而拔燔燒積聚夷蕩營砦俘掠以歸金人自是不敢窺襄漢矣襄陽許國移金陵宗政代爲荆鄂都統制仍知棗陽中原遺民來歸者以萬計宗政發廩贖之爲給由創屋以居籍其勇壯號

忠順軍俾出沒唐鄧間威振境外金人呼爲孟爺爺俄
病疽卒轉右武大夫團練兼防禦使宗政於有功者之
必賞有罪者親必罰好賢樂善出於天性未嘗學兵法
而暗與之合死之日邊城爲罷市慟哭子琪自有傳

周昭禮輝

周輝字昭禮淮海人紹熙間居錢塘清波門之南嗜學
工文辭隱身不仕當世名公卿多折節下之而簡亢自
高未嘗報謝非義之餽一介不苟取藏書萬卷父子自
相師友誤清波雜志十二卷

禮部侍郎洪芹

洪芹尚書僕射适之曾孫以祖蔭入官甫更調登進士第歷官將作少監屬詞臣無當上意慨然思得天下士丞相程元鳳言當今地望無踰洪芹者進兼翰林權直秘書少監升直學士院權禮部侍郎中書舍人屬兵興帝悟柄任非人自貽國禍詔書所至聞者奮激蓋芹所草也丁大全罷相出典鄉郡芹繳奏大全鬼域之資穿窬之行暴戾淫頽引用凶惡陷害忠良遏塞言路濁亂朝綱乞盡從諫臣所請追官還窠以伸國法以謝天下

沈炎乘上怒攻丞相吳潛芹獨繳奏曰方國本多虞潛
星馳赴闕理紛鎮浮陳力爲多一旦視爲弁髦得無如
詩所謂將燕將樂女轉弃予乎慷慨多言天下義之遷
禮部侍郎帝銳意嚮用而以論去寓居嘉興怡然自適
咸淳初起知寧國府卒

奉知政事高不妄斯得

高斯得字不妄邛州蒲江人寓居烏程之玉村舉紹定
二年進士授利路觀察推官時父稼知沔州死於兵斯
得日夜西向號泣會其僕至自沔知稼戰歿處與斯得

潛行至其地遂得稼遺體奉以歸見者泣下服除而哀傷不已無仕進心川帥李心傳方修四朝史辟爲史館檢閱書成進於朝遷史館校勘時丞相史嵩之柄國斯得遇對空臆盡言冬雷斯得應詔上封事乞擇才並相由是忤嵩之意出判紹興府杜範入相召爲太常博士遷秘書郎六年正月朔日有食之斯得應詔復上封事極言嵩之以大姦嗜權巧營奪服陛下奮獨斷而罷之是矣第諫憲之臣交疏其惡或請投之荒裔或請勒之休致乃一切寢而不宣是以謫言並興善類解體謂聖

意之莫測而大姦之必還莽卓操懿之禍將有不忍言者。嵩之恨切骨與羣儉合力排擠斯得力求補外差知嚴州遷浙東提點刑獄移湖廣按富民陳衡老姦罪籍其家其婿吳自性厚賂宦者使中傷斯得乘間言於理宗曰高斯得以緡錢百萬進願易一近地理宗曰高斯得硬漢也安得有是召爲禮部郎權左司兼侍立修注官論罷踰年以直寶文閣知泉州遷福建路計度轉運副使朝廷行自實田斯得言按史記秦始皇三十一年令民自實田土上臨御適三十一年而異日書之史冊

自實之名正與秦同丞相諸方叔大規卽爲之罷丁太
全人相御史沈炎論斯得以國漕交承錢物下郡吏天
府榜死數人安吉守何夔然奉行其事陵轍甚至斯得
不少挫竟無所得大全旣請拜斯得浙西提點刑獄炎
浙西人乞於上前乞更之移浙東提舉常平命下給事
中章鑑繳還斯得杜門不出著孝宗繫年要錄度宗卽
位召爲秘書兼同修國史實錄院同修撰仍兼侍講進
高宗繫年要錄綱目帝善之未幾帝崩陳宜中入相以
樞兵部尚書召斯得痛國事之貼危忠憤激烈指陳實

時之事無所遺拜叅知政事元兵下饒州臺諫徐直友等論似道誤國之罪乞安置嶺外簿錄其家丞相劉夢炎庇護似道止令散官居住且言簿錄擾及無辜斯得謂散官則安置追降官分司則居住祖宗制也夢炎語塞遂乘間直罷去平章事王燭監察御史俞浙併罷斯得而於是宋亡

石文殿修撰焦濟甫炳炎

弟煥炎附

焦炳炎字濟甫宜州人寓居嘉興舉進士第三人理宗朝爲諫官論奏果數百上時宰主括田議遠近騷動炳

炎痛疏其害，復面奏懇劄，涕淚俱下，上爲動容。然未有寢命。炳炎論愈力，時宰語入曰：「焦生非攻括田實攻我也。」炳炎聞之不爲變爭之，益力必報寢而後已。尋除太常少卿，疏辭去國。累除淮東湖北漕，悉不就。改吉安府，不得已就職。以右文獻修撰致仕。弟煥，炎字晦用，亦舉進士，登對論奏，切中時弊。有兄之風。生平英邁慷慨，禦邊多顯效。仕至鎮江太守。

敷文閣學士言宗文通

言通字宗文，本吳人文學子游之裔也。咸淳二年，以敷

文閣學士知紹興悅其山川之秀遂卜居北鄉子孫遂
爲山陰人

顯謨閣學士劉德修光祖

劉光祖字德修簡州陽安人登進士第除劍南東川節
度推官召對論恢復請以太祖用人爲法除右正言出
知果州以趙汝愚薦召爲侍左郎官光宗初政方嚴御
史之選顧謂宰相留正曰卿監郎官中有其人正沉思
久之曰得非劉光祖乎上曰是久在朕心矣光祖入謝
因極論朋黨邪正是非之辨言甚剴切章旣下讀之有

流涕者徒太府少卿求去不已除直秘閣提刑江西時
孝宗不豫上久不過官光祖致書留正趙汝愚曰宜與
羣賢并力一心若上未過官宰相不可歸安私第林陳
二閣自以獲罪重華日夜交謀其間宜用韓魏公逐任
守忠故事以釋兩官疑謫大臣亦當收兵柄密布腹心
俾緩急有可仗者寧宗卽位除侍御史司農少卿入對
獻謹始五箴進起居舍人論政令當出中書陛下審而
行之人主操柄無要於此時知閣門使韓侂冑寢擅威
福故首及之遷起居郎集議卜孝宗山陵與朱熹皆謂

會稽土薄水淺乞議改卜既而熹與祠光祖連上疏論
救俱不報已而論罷出爲湖南運判不就主管玉局視
趙汝愚旣罷相佞胄擅朝遂目士大夫爲僞學逆黨禁
錮之光祖撰涪州學記謂學之大者明聖人之道以修
其身而世方以道爲僞小者治文章以達其志而世方
以文爲病好惡出於一時是非定於萬世諫官張釜指
爲謗訕比之楊惲奪職謫居房州久之復職歷官顯謨
閣學士以蜀地險遠寓居德清之新市市人呼其家曰
川劉嘉定十五年卒進華文閣學士謚文節趙汝愚稱

范祖論譎激烈似蘇軾懇惻似范祖禹世以爲知言

端明殿學士王仲行希呂

王希呂字仲行宿州人避亂徙合肥以祖父廕補官建炎間扈蹕南渡僑寓嘉興以事忤秦檜去孝宗獎用西北之士召試登進士第授秘書省正字除右正言時張說以攀援戚屬擢用再除簽書樞密院事希呂與侍御史李衡交章劾之上疑其合黨邀名責知廬州方說之見用氣勢顯赫後省不書黃學士院不草詔皆繼斥逐而希呂復以身任怨去國之日屏徒御躡屣以行姑

不爲解由是直聲聞於遠邇淳熙八年以龍圖閣學士知紹興府百廢具興尤敬禮文學端方之士紹興和買絹最爲民病雖屢經裁減額數尤多希呂復奏減六萬七千疋太守洪邁繼而行之由是越民始安仕終吏部尚書端明殿學士移家會稽貧不能廬寓居僧舍孝宗聞之賜地一區錢六百萬緡令有司造第於越之東隅子孫世居焉卽今所稱後衙池也

刑部尚書程季與公許

程公許字季與叙州宜化人少負奇節不肯依阿舉

定四年進士、歷官大理司直、遷太常博士、御史杜範、
執政李鳴復不行、徙右史、竟拂衣東歸、鳴復坐政府、
若公許翰對言志士仁人、要逆鱗、賈衆怒、不過爲陛下
通耳目爲朝廷立綱紀而已、今也假以職而弃其諫、
其退而優其遷、則是自裂其紀綱、自蔽其耳目、臣恐自
此同類沮失、各起遐心、來者相戒、以爲容默、陛下愈孤
立無助矣、遷著作佐郎、兼直舍人院、時諫官郭磊卿以
論事不報出關、徐榮叟亦抗章引去、公許奏乞還言官、
解安厥位、已而史嵩之自注上、入相、臺諫謝方叔輩、

繼他徒公許又奏外難憑陵國勢岌若緩施朝廷上自
爲弗靖陽爲遷除陰奪言職此中外所以怏怏遷將作
少監拜太常少卿力請外遂以直寶謨閣知袁州及逐
不才臺諫權公許起居郎兼直學士院公許入奏不可
不堅疑者七帝語之曰卿一去三年今用卿出自朕意
時鄭清之以少保奉祠侍講幄中批復其子士昌官職
與內祠且許侍養行在所蓋士昌嘗以詔獄追逮或云
詐以死聞清之造闕號泣請於帝故有是命公許繳奏
士昌罪重京都浩穰姦宄雜揉恐其積習沉錮重爲

之累莫若且與甄復少慰清之內嗣侍養之命宜與收
寢帝遣中貴人密以公許疏示清之清之衛公許入骨
日夜於經筵短公許而周坦妻與清之妻善因拜坦殿
中侍御史坦首疏劾公許以寶章閣待制知建寧府清
之再相公許屏居湖州者四年已而差知婺州未上帝
後召爲文字官清之奏已令守婺帝曰朕欲其來乃授
樞刑部尚書入對疏陳時弊七事薦知名士二十九人
時罷京學類申散遣生徒公許奏京學養士其法本與
三學不侔往者立類申之法重輕得宜人情便安近一

且忽以鄉庠教選而更張之、使縫掖皇皇市塵、敢怒而不敢議、京邑四方之極、而庠序一空、弦誦寂寥、非所以作成士氣、尊崇教化、清之益不樂、授藁御史陳垓、以劾公許、太學生劉黼等百餘人、伏闕上書、論垓、且請留公許、而公許卒、遺表上、帝嗟悼、贈宜奉大夫、官其後、公許冲澹寡欲、晚年惟一僮侍、食無重味、一裘至數十年、家無美儲、賑給親戚、惟恐後、蜀有兵、難族姻奔東南者多、依公許以居。

叅知政事楊元極棟

楊棟字元極眉州青城人紹定二年進士第一歷官樞
密院編修官出知興化軍孔子之裔有居涵頭鎮者棟
爲建廟闢田訓其子弟遷都官郎歷左右司郎官陞宗
正少卿進對帝曰止是正心修身之說乎棟對曰臣所
學三十年止此一說用之事親取友用之治凋郡察冤
獄最爲簡易歷遷同知樞密院事拜叅知政事台州守
王華甫建上蔡書院言於朝乞棟爲山長詔從之因卜
居於台未幾授資政殿學士知建寧府不拜尋奉祠卒
特贈少保棟之學本諸周程二氏負海內重望學者稱

爲平舟先生所著有崇道集平舟文集

處士宋斌

宋斌袁州人少從黃幹李燾登朱熹之門學禁方嚴困於京邸孤潔抗高不取非義年且八十矣不以窮老失節臨安尹趙與惟延之事以父行奏乞用旌禮布衣故事不報死葬西湖上與惟歲一奠其墓都人謂端明此舉不異曾參之事蓋公至今以爲美譚

周子受祐

周祐字子受自長城徙居武康以春秋登進士第沉靜

寡交不事表暴恬然若布素無仕進心丞相留正葛邲以文行薦於朝除諸王宮教授以疾力辭累敦促赴闕卒不就

觀文殿學士李長孺曾伯

李曾伯字長孺單懷人寓居嘉興曾伯儒而知兵有雅量歷官通判制置安撫學士等官宦輒遍宇內淳祐間特賜同進士出身以大學士知福州兼福建安撫使其後旋起旋罷仕至觀文殿學士贈少保開府儀同三司曾伯初與賈似道俱爲閹帥邊境之事知無不言似道

卒嫉之不竟其用有可齋類稿行於世

國子正鄭宗仁樸翁

鄭樸翁字宗仁平陽人。以上舍釋褐。歷福州教授。除國子正。宋亡。諸陵被發。骸骨暴露。樸翁不勝悲憤。與友人林景熙謀。間行拾之。語在景熙傳中。既而歸隱。薊山瀑下。會稽王英孫高其誼。延致賓館。教授子弟二十餘年。以病卒。林景熙志其墓曰。余與鄭公生同里。學同師。由長至老。又同出處。而公沉澁直方。自許致君澤民。志不獲遂。猶以語言文字。扶植綱常。精衛填海。憑霄啣土。重

可悲也。所著有四書要指二十卷、正義一卷、雜著二卷、日續古、有詩一卷、日厚倫、皆精實、並傳於世。

靖明殿學士家鉉翁

家鉉翁眉州人。以蔭補官。歷秘閣修撰、知臨安府、兼海
西安撫使、遷戶部侍郎、兼樞密都承旨。賜進士出身。拜
靖明殿學士、簽書樞密院事。大元兵次近郊。丞相吳堅
賈餘慶檄告天下守令以城降。鉉翁獨不署。元帥遣使
至。欲加縛。鉉翁曰：「中書省無縛執政之禮。」堅奉表祈請。
於大元。以鉉翁介之。禮成。不得命。留館中。聞宋亡。旦夕。

哭泣不食飲者數月。元君以其節高，欲尊官之以示南
服。鉉翁義不二君，辭無詭對。三官北還，鉉翁再率故臣
迎謁，伏地流涕，頓首謝奉使無狀，不能感動上，衆無以
保存其國。見者莫不太息。文天祥女弟坐兄故繫奚官，
鉉翁傾橐中裝贖出之，以歸。其凡壁鉉翁狀貌奇偉，被
服儼雅，其學邃於春秋，以館河間，以經教授，數爲諸生
談宋故事及宋興亡之故，輒流涕歎息。成帝卽位，放還
賜號處士，錫賚金幣，皆辭不受。居於越，與林景熙相唱
和以終終。

謝臯羽翱

謝翱字臯羽，福之長溪人。父鎬以春秋名家，翱世其學。翱儻有大節，而獨行好修，刻厲憤激，直欲起古人從之。游不忍混流俗，意所不顧，雖萬夫莫回。每慕屈平托興遠遼，因自號晞髮子。當元兵取宋時，文天祥開府延平，翱領家資結里中豪傑數百人赴難，遂參軍事。天祥轉戰閩廣，至潮陽被執，匿民間。流離久之間，行抵勾越，勾越多故家，而王監簿諸人方延致游士，日以賦詠相娛。樂翱時出所長見者，絕倒不知其爲天祥客也。然終不

自明遂結社會。稽名其會所曰。沙社。期晚信也。嘗行禹
穴間。循山左右。窺祐思諸陵。北向哭。東入鄣。過蛟門。臨
大海。則又哭。晚登子陵釣臺。迴絕千尺。西望臨安故宮。
猶隱隱烟樹間。不勝黍離之感。急命酒設。天祥主於石
上。醉酒勸哭。取竹如意擊石。作楚歌以招之。歌曰。魂朝
往兮何極。暮歸來兮關水黑。化爲朱鳥兮。今有味焉。食歌
畢。竹石俱碎。哭失聲。其志益汗漫。浩不可禦。視世間無
足當其意者。獨好佳山水。遇卽恣游。倦卽尋隱。流方風
興。思齊輩。吟咏自適。至元甲午。去家武林西湖上。前代

趙老尚多存者，咸詫見翔晚，明年以疾卒，年四十七，屬
續，屬妻劉氏曰：吾去鄉千里，交游中惟方鳳與思齊最
善，慎收吾文付之，已而鳳與思齊果至，相與葬翔於白
雲村，以文爲殉，伐石題之曰：閩詩人謝翔墓，初翔以朋
友道喪，作許劍錄，未就，方鳳爲作許劍亭於墓左，從翔
志也。

資政殿學士文時學及翁

文及翁字時學，綿州人，徙居吳興，仕宋，歷官資政殿學
士，景定間言公田事，有名朝野，宋亡，元世祖累徵不起。

開門著書有文集二十卷

元 共二十七人

禮部尚書謝叔敬昌元 子大椿附

謝昌元字叔敬西蜀資州人。類試四川第一。調紹慶府教授。遷太學博士。知封州。提舉廣東茶鹽。奏蠲鹽銀以寬民力。疏人不報。捐俸代償之。爲沿海叅議官。因家於鄞。開慶初。長子大椿挈其家屬來。舟由鄂州。元世祖駐兵江許。獲其舟。以大椿歸。甚愛之。俾給事殿中。十四年。宋平。命大椿召昌元入朝。上深器之。呼爲南儒。預議中。

書省事爲禮部尚書上疏言增軍餉結民心除僭更戢
新軍上允其議又乞行選舉收遺書擇按察官嚴賊吏
法置登聞鼓院至元混一之際朝廷大議昌元皆得與
聞後乞身歸卒葬於鄞

南坡老人戴仲文時才

戴時才字仲文鄱陽人丰度清雅喜賓客好施與至正
間薄宦兩淮有長才短馭之歎遂弃去買舟南下渡錢
塘觀胥溝素車白馬千乘萬騎從海門而來勢吞天漢
不覺魄動直抵蕭山探五洩之奇遂忘身世竟卜居湘

湖之濱以登涉吟咏自娛人稱爲南坡老人

監察御史韓勒海壽

韓勒海壽字允常河南人徙家山陰爲人剛正有志節
拜監察御史命下之日中外想其丰采時殿中侍御史
合麻及其弟雪雪交通賄賂怙權肆虐道路側目海壽
慨然曰昔張綱埋輪而先擊當道之豺狼知所重也
諫許風聞言事矧目擊乎遂疏其罪惡對仗彈之一
權貴爲之束手官至浙東廉訪使

太常卿于伯機樞

鮮于樞字伯機，漁陽郡人。仕元爲江浙行省都事，愛正
湖山水，因家於杭。風流文雅，善詩歌，尤工染翰，名在吳
興。趙文敏伯仲間，遷太常簿，致仕。西門真文靖贊其像，
曰：「欽風沙裘劍之豪，爲湖山圖史之樂。翰墨軼米薛而
有餘，風流擬晉宋而無忤。是以吳興公運西沙之錐，刻
希世之玉，使千載之下眼識二妙於遐邇。」

劉師魯汶 劉濩附

劉汶字師魯，郕王之六世孫也。占籍錢塘，以文章淑後
進，德行學術與劉濩齊名。劉濩字聲之，莆田人也。占籍

於杭與師魯俱以文行爲一時寓賢之首稱二劉先生
夷門老人杜行簡敬

杜敬字行簡大梁人至元大德間朝廷講求禮樂之事
敬與其友張君錫同寓於杭是時集賢柴貢父尚書高
彥敬都魯鮮于伯機承旨趙子昂侍讀鄧善之尤善鑒
古有清裁敬與之上下其議論諸公以爲博雅延祐初
朝廷首起張君錫爲大樂署正次及行簡行簡善鼓琴
知音律尤長於書喜蓄古名人墨跡大冠長裾優游湖
山文酒間耽耽夷門老人

張潞公仲舉翥

張翥字仲舉其先晉寧人父爲吏從征江南調安仁尉
又爲杭州鈔庫使因家焉翥少豪放不羈好蹴踘走馬
喜聲色不以家業屈其意父憂之一旦改節閉門讀書
因受業於李存又從仇仁近學以詩文名一時累官翰林
學士承旨封潞國公所著有峴庵集忠義集翥初在
都下嘗寄周伯琦詩曰天子臨軒授鉞頻東南無地不
紅巾鐵衣遠道三軍老白骨中原萬鬼新義士精靈虹
貫日仙家談笑海揚塵都將兩眼淒惶淚哭盡平生幾

故人其詩多憂時慷慨類如此

翰林學士貫酸齋雲石

貫雲石元功臣阿里海涯之孫其父名貫只哥雲石遂以貫爲氏名小雲石海涯生而神采秀異膂力絕人稍長折節讀書目五行下吐辭爲文不踴故常意肯出人意表仁宗時官翰林學士稱疾還江南賣藥錢塘市中詭姓名易服色人無識者結廬龍華山上自號酸齋教授敖君善繼翁

敖繼翁字君善福州人寓居烏程築一小樓冬不爐夏

不羈惟事經史吳下名士從之游者甚衆浙西平章事
高彥敬薦授信州教授有文集二十卷

集賢直學士鄧善之文原

鄧文原字善之綿州人至元中辟杭州路儒學正因家
於杭累官翰林待制出僉浙西廉訪司事吳興民夜歸
爲邏邏者所逐遁去忽追及刺之仆地比死其兄問殺
者何人曰白帽青衣長身者兄懇有司執直初更者誣
服械繫三年文原行部錄之疑焉鞠之乃得真殺人者
桐廬人戴汝惟家被盜有司獲盜獄成送郡夜戴某

火竟失汝惟文原曰此必有故乃得其妻與其弟謀殺汝惟狀人皆以爲神文原博學工文家貧行潔屢拜清華輒以疾辭官終集賢直學士謚文肅

福寧州尹王伯敬簡

妻潘氏子相楨附

王簡字伯敬霑化縣人父吉昌任濟南府治中元統間簡以材薦授祁陽縣尹後改尹烏程因家焉後遷福寧州尹至正十二年劇賊王善寇建邵迫州境簡率民力戰馬中流矢被執不屈罵賊而死尸立不仆頸中無血惟滿白沫如流骨賊驚以爲神次子相亦被擒遇害妻

潘氏聞變恐被辱先自縊家奴逃還報其長子楨楨往
收得父母尸歸葬烏程江浙行省上其事贈奉議大夫
濟南路總管上輕車都尉大原郡侯以楨襲父爵除紹
興總管張士誠陷其城亦以不屈死

洛下遺民郭彥澤

郭彥澤河南人少有氣節高自稱許有葛先生者神於
醫盡以其術授之避地武林自稱曰洛下遺民

戶部尚書貢泰甫師泰

族子友初附

貢師泰字泰甫寧國宣城人蚤歲游京師入胄監時吳

草廬趙松雪及虞揭諸名公皆與之游。後中選累官至
編修。又擢平江路總管。值張士誠兵亂。隱居吳淞江。易
姓名作幽懷賦以自見。至正間起授兩浙運使。戶部尚
書奉詔漕閩廣粟海上多警。留居海寧。與諸生朱燧謝
肅胡奎輩講學。八月自海寧航海達閩。轉漕京師。次年
自閩浮海復還海寧。寓縣東湖塘村。命其里曰小桃源。
卒葬湖塘村之南。所著有玩齋集。行於世。其族子名友
初。至正間從師泰。叅政江浙行省。因僑寓錢塘。友初詩
才清麗。但纖穠乏骨。獨送戴伯貞還廣西一律。敘事盡

由而感慨繫之爲時所稱賞

馬從事易之

馬易之名乃賢本葛邏祿氏漢姓爲馬世居西北之金山後爲南陽人其兄塔海仲良宦游江浙易之遂家於鄞博學能文尤長於詩志尚高潔不屑爲科舉科祿之文平生所爲歌詩不規規雕刻而溫柔敦厚有風人之致嘗游京師出入賢豪間每一篇出士人輒傳誦之至正間用薦爲編修官需次於家時桑哥失里同知樞密院事領軍東蘭州辟爲從事官後命移軍直沽易之

病風瘡而卒。所著有金臺集、海雲清嘯集行世。

侍儀舍人陳雲嶠相

陳相號雲嶠，性豪宕，喜結客。其祖平章，故宋制置使，積金七屋，不數年散盡。常爲侍儀舍人，內閣諸老、朝省名公，莫不折輩行與交，咸稱之曰公子。其妻鐵太保女也。侍富貴，近戚偶以一言驕之，遂終身不見。嘗被命監鑄祭器於杭，無錫倪元鎮慕其名來見之。張燕湖山間羅設甚盛，酒終爲別，以一帖餉米百石。雲嶠命從者移置近所，舉豆觥引妓樂促從者而前，悉分散之。顧倪曰：「吾

在京時卽熟爾名。云南士之清者他無與比。其所以意
章者蓋以米沾之也。請從今日絕交。且罵諸嘗譽之者。
時張伯雨在坐。不勝跼蹐。其豪氣類如此。嘗雪中騎牛
拜米。南宮墓詩云。少年不解事。買駿輕千金。何如小童
犢。踏雪空山深。小小雙牧童。吹笛穿松林。醉拜南宮墓。
地下有知音。言世上無知音也。平日喜居西湖。縱游兩
峯。三竺間。好古有餘。而治才不足。又不樂小官。怒罵宰
相。年逾六十。不得志而死。

繆叔舜倫

繆倫字叔彝東平人侍父宦游於錢塘至正十六年淮
兵寇城執其父將殺之倫哀號乞免弗聽傾家貲以贖
又弗聽乃自縛請代於是殺倫而釋其父杭人憐其以
身殉父也醢錢以葬伐石題之曰東平繆孝子墓

孝子張端

父君錫州

張端涿州人父君錫至正末任平陽州判官因家焉時
周嗣德守平陽因辟君錫爲樞幕都事方明善攻破平
陽君錫被俘端隨往日夜涕泣不食父謂曰我分在公
死爾歸視爾家勿以我爲念端曰父辱子死理之常也

大人萬一不諱端安可獨生乎既而明善沉君錫於江
端卽擲身江中抱父俱沉而死父子忠孝人至今憐之
可閒老人張光弼昱

張昱字光弼江西廬陵人至正時爲江浙行省左右司
員外而所卜私宅在壽安坊頗湫隘甚昱居之晏如也
因署楹間曰晏居張士誠起昱棄官不仕頗以詩酒自
娛號一笑處士及元亡高祖聞其名召見欲官之因
其老曰可閒矣放歸故又號可閒老人當是時其居已
敝友人凌雲翰爲醴錢輯之交游爭爲之助不旬日而

輪奐一新。昱每處西湖上。簾衣襦食。讀書賦詩。以適其志。所著有左司集行世。

薩都刺天錫

薩都刺天錫。雁門人。寓居武林。博雅工詩文。風流俊逸。而性好游。每風日晴美。輒肩一杖。掛瓢笠。腳踏雙不借。徧走兩山間。凡深岩邃壑。人迹所不到者。無不窮其幽勝。至得意處。輒席草坐。徘徊終日。不能去。興至則發爲詩歌。以題品之。今兩山多有遺墨。而西湖十景詞尤膾炙人口。竟莫知其所終。

丁鶴年

丁鶴年先西域人父職馬祿丁徙居武昌鶴年因以丁爲氏生甫十歲屹然如成人武昌以鶴年倜儻類已俚廕從父桓州職鶴年辭謝益厲志文學年十七通詩書禮三經元至正間淮兵渡江襲武昌鶴年奉母以行備歷難阻聞從兄吉雅謨丁爲定海令徒步往依焉薦章凡九上皆辭不就旣而兵戈四起鶴年深匿海島中轉徙不常入國朝占籍定海鶴年久處艱瘁隆冬衣不掩脛濟之者雖饘粥之費無所受泊然不樂仕進凡憂憤

愉悅皆發之於詩歌所著有海巢集

李原善善

李善字原善山東東平人父灝仕元爲三山巡檢遂家於慈谿善刻苦摩厲篤志問學處窮約簞瓢自樂襟度裕如喜怒不形於色人莫窺其涯涘嘗扁所居之室曰人性皆善日吟哦其中人美其詩詞豪放目之曰小李百所著有崇陽藁

鄒聞達世聞

鄒世聞字聞達登之黃縣人用世襲管軍百戶戍於海

寧地瀕海。竈民多私鬻鹽。而禁甚重。有犯者。例與管民官共理。管民官欲覓法。聞曰。民貧故耳。卒不覓法。民皆稱爲鄒父。會張氏陷浙西。見元兵有從逆者。聞切齒罵不絕口。後屏居峽石。元亡。不食而死。

明 共一十九人

兵部尚書溫祥卿

溫祥卿。大同人。精通陰陽術數之學。元末。避兵家於長興。耿炳文初下湖州。民心未附。祥卿杖策以布衣進謁。炳文與語。竒之。遂留叅軍務。祥卿卽爲炳文畫策。卽發

原以賑飢者出精兵分據要害治戰具爲守禦計未幾而吳平實炳文爲之前角也祥卿以贊畫功累官至兵部尚書時天下初定高皇帝留意民艱簡大臣有才望者十三人出爲十三省布政使祥卿與焉而得四川高皇帝特命學士宋濂撰文贈之當世以爲榮

戶部侍郎高季迪啓

高啓字季迪姑蘇人爲吳下詩宗元季避地蕭山天兵下平江始還故里仕至戶部侍郎其詩文有缶鳴槌打太史等集行於世

國子監助教李宗表墓

李畢字宗表其先汴人元季從家錢塘少從永康鄭傳
遊傳奇其才以女妻之避兵金華翱翔永東二邑間國
初有司奏補國子監助教未幾以病免歸卜築永康魁
山下講學授徒與諸詩人唱酬爲樂略不以貧屢介其
意天台徐一夔嘗評其詩云其緣情指事機動籟鳴無
窮搜苦索之態而語皆天出不踰盛唐矩矱識者以爲
確論門人唐仲暹編其詩文爲草閣集凡七卷

貢友初性之

貢性之字友初宣城人師泰之從子也初以胄子除鎮
尉有剛直名後補國理官元亡高皇帝徵錄師泰之
後大臣以性之薦性之改名姓居會稽躬耕自給或勸
之仕默不應卒門人私謚曰貞晦先生

太常張來儀羽

徐賁附

張羽字來儀潯陽人元季授安定書院山長因欲卜居
吳興以詩約其友人徐賁曰吳興好山水子我盍遷居
繞郭羣峯列廻波一鏡如鑑餘即宜稼樵罷亦堪漁結
屋雲林下殘年共讀書於是定居於戴山東洪武初仕

至太常寺丞、兼署翰林院同掌文淵閣事、詩文奇古、尤善畫、葬九里岡、湖學教授金華童冀銘其墓、徐賁字紳文、蕪州人、因張羽之約、遂遷烏程之蜀山、詩有北郭集、以吳中所居在北郭故也、當是時、高啓、楊基、與羽、賁齊名、時稱高、楊、張、徐。

太常少卿高士敏異志

高異志字士敏、蕭縣人、元末寓居嘉興、師事宣城貢師泰、番陽周伯琦、遂昌鄭之祐、爲文有氣骨、成一家言、以薦起鄞山書院山長、洪武初徵修元史、爲翰林編修、累

官至侍講學士、太常少卿、卒謚文忠。

文淵閣待詔陳中復遠

陳遠字中復、漢之郢城人、生而穎悟、讀誦一過輒不忘、弱冠游學宜饒間、從中書左丞韓伯高受易、得專門奧旨、工草隸、得晉人筆法、藝事無不研習而尤善模寫人物、過四明愛其俗尚淳厚、遂家焉、太祖耳其名、召至

闕廷、命寫御容、稱旨、賜金帛、以文淵閣待詔歸里。

成祖繼統、復遣中貴驛召入覲、賜賚益厚、憫其年老賜歸、遠爲人清峻、剛直毅然、不可犯、而意度閒雅、接之則

程氣謨如故士大夫多敬慕焉

監獄御史桑仲修慎

桑慎字仲修世居常州遷嘉興性孝友苦行力學洪武初爲監察御史見事廷諍朋友有過輒面折之以行部湖南奏諫衛使張榮坐不避人議罪謫瓊州安置已而召還卒於家

戶部員外郎邵伯正

邵伯正先世汴人宋南渡居高郵洪武初徙家嵯縣由鄉舉爲南京戶部員外郎善經賦出納惟允以廉能稱

尋有令江浙人不得官戶部遂謝事歸杜門好書善教
族明宗纂敘圖系刻俗爲之歸厚云

知雲南縣高彥高岳

高岳字彥高本畏吾氏高昌裔也大父事元爲江南行
臺御史中丞岳博學有才華儀容秀整人望而敬之工
草書丹藥卜筮之術無不研解洪武間薦知雲南縣免
官寓家嘉興之魏塘子孫今爲魏塘人

會稽二無名氏

無名氏二人當永樂初一爲樵者寓若耶溪日齎薪兩

束足食則已食已往畫詩溪沙上畫已輒亂其沙人惟
之一日忽從後抱持乃得讀其詩云夢入鴟班觀紫宸
醒來依舊泣孤臣半生家國惟餘我萬里江山竟屬人
無地可容王蠋死有薇堪濟伯夷貧伶仃苟活緣何事
要了焚焚一點真一爲僧寓雲門寺不知其所由來每
從一童子携茗具筆牀泛舟四游賦詩滿袖歸則焚之
不留一字此兩人者疑皆建文忠臣晦姓名而逃者也

赤松山農金元玉琮

金琮字元玉世爲儒醫琮稟賦穎敏自爲兒時與羣兒

異稍長知學十二三能大書十四五讀其父書既半弃去謂明師讀易及諸子史寒暑晝夜不少休既克然有得乃下筆爲文章浩瀚有奇思鵬騫海怒令人不可正視歷試不偶於時益肆力問學暇輒怡情吟咏尤嗜臨池初學趙魏公得其真似晚師張伯雨更神雋可愛求者無虛日嘗遊浙之赤松山愛其佳徘徊不能去因家焉自號赤松山農居常超視清嘯人莫能窺至其處已接物高簡粹白王公貴人雅相顧慕非先施未嘗一登其門卒年僅五十有三士大夫多悲悼之弟璿姪城山

俱文雅克稱其家

鄧吏部林

鄧林南海人初名善觀以南昌教授擢吏部驗封主事成祖更名之曰林後坐法謫戍保安遇赦歸居於武林詩文爲一時推重

行人司副唐子迪志大

唐志大字子迪上海人嘉靖辛丑進士奏名三甲第五例當得華要之階時母老乞南曹冷局以便就養遂得南京行人司左司副便道歸將迎母以行比歸而母病

依違者久之遂上疏乞終養歸敦行色養之道躬親稼穡
穡稂豆於園種魚於池以給甘旨或缺乏則解衣質貸
略不爲意人以非道餽之弗受也閒居樂志自謂三公
不易遂無復有用世意方與二三同志擬結社山中爲
終老計而倭從海上起矣初倭寇之來不滿百人東南
人不習兵禦之無策各滿意而去志大歎曰寇玩我矣
且貪吳中富後必大至因作海防議其言鑿鑿切中肯
綮書成以示所知乃又歎曰人殆謂予將以求用邪遂
秘之甲寅寇果大至聞吳興地僻兵宜不至遂奉母與

羣從弟妹子婿居焉。旣又念族人之無依，慮其不免，乃
闢地結廬數十椽，舍其不能自存者，悉徙而居之。上下
及千指，而志大以一人拮据其間，爲之籌畫生計，勞瘁
心力，無何而疾作。先母夫人志大朝夕扶持，得無恙而
妹婿與季父輩相繼淪逝。志大不勝哀痛，親護二喪，衝
冒兵刃，歸葬故鄉。復趨還吳興，遂及於病，竟不起。嗚呼！
世衰道喪，人各私其身，視同胞兄弟若塗之人矣。一遇
利害，甚有父子不相顧者。志大乃合其族以身任之，闢
險阻，至劬瘁以死。彼若人者，聞志大之風，有不知愧

者乎志大與人交推誠任真中無町畦見者莫不知愛雖其嫉邪矯俗之意確乎不拔而又不肯爲說異可駭之行郡縣交際如常未嘗于以私於法不便者則入言之性喜急人之難有急者往告之未嘗不應應之未嘗不盡力力盡而止平生不事積蓄卽冠履裘襦之類亦無長物湏俟其敝乃更爲之至於賑給貧乏如恐不及其人吳興也同郡徐孝化伯臣董太學子元亦俱至相與結社賦詩登高弔古憂時懷憤彼此唱酬典雅悲壯有開元之遺音所著有僑居賦及詩文若干卷又輯

高廟聖政記六十四卷藏於府

太白山人孫太初一先

孫一先字太初或云關中人眉宇炯炯冠岸獨立嘗讀
老氏書至專氣致柔之語委心其學弊家入太白山守
中致虛因以太白山人自號爲詩豪和孤峯前無古人
邇名流勝士輒唱和擊鉢限韻響未絕而詩成諸率發
耳一時詩名噪天下中歲好游嘗往來西湖茗雪間踪
跡大半寄山寺中意態超脫令人起塵外之思且好談
時事率鑿鑿副名實用世之士顧益喜願與之交後買

田茗溪之傍居焉。建業劉麟龍覓成徙居湖。與吳克隆
置暨一元結社遊。號茗溪五隱。

工部尚書劉元瑞麟

劉麟字元瑞。金陵人。弘治丙辰進士。歷官刑部郎中。知
紹興府。時中貴劉瑾招權納賄。天下諸郡邑爭輦寶貨
走其門。麟獨清亢自負。絕不通瑾。憾之。搢搢微細。奔其
官。詔從中下士民聞之。奔走號泣。爭歛千金爲贈。麟笑
曰。昔寵一錢。今與寵執事。爾輩以古今人不相及耶。遂
去之。越人感其德。小鎮名曰小劉祠。蓋配寵爲大。

劉云既免官悅雪川山水遂寓居長興適歲飢晨炊不繼士大夫相與謀曰可使劉元瑞飢餓於我土地耶歛粟贈之笑而不受瑾誅復起累官至工部尚書立節慎庫宿弊盡剗宦途所至勲業卓然至居林下蕭然一室清苦砥礪賦詩自娛尺牘蒸麗人爭寶之李默作坦上翁傳卒年八十有八贈太子少保謚清惠

袁武選永之袞

袁袞字永之長洲人生而奇穎五齡知書七歲賦詩有奇語嘉靖乙酉應天鄉試第一舉進士授武選主事嗣

忤富路。編戍湖州。表至吳興。寓居城南之峴山寺。棲青
弔古。悠然自適。後人以其所寓處。稱爲胥臺。讀書樓。蓋
因號以致思也。

行人薛尚謙侃

薛侃字尚謙。揭陽人。操行純固。夙慕正學。嘉靖間登進
士。官行人司司正。時世皇帝前星未曜。有識者憂之。
侃具疏草。有定國本。辨人才等語。當是時。永嘉方柄國。
而貴溪新有寵。永嘉患其偏已。思去之。未有間也。適有
補得侃疏草者。密獻永嘉。永嘉入言。上此。夏言所爲。

導薛侃上疏不數日侃疏果上上大怒急捕侃
解平臺親鞠之令其必引夏言侃厲聲曰疏萬罪皆臣
侃所爲何與他人拷至死者再體無完膚竟不變詞
上尋亦庶知其妄乃釋貴溪而罷永嘉侃以狂妄褻職
於是朝野人士皆重侃勁氣顏死不易詞有古烈士風
侃素慕王陽明先生學早出其門精思力踐師門以勇
銳見稱既以罪廢遂徙家於杭築天真精舍以祀陽明
而時與同志講學其中且爲戒於後曰此講學公所後
世王氏薛氏子孫世世無所與

卷之五

孝豐知縣施以德懋

孝

附錄

孝豐知縣施以德懋 戴經附

施懋字以德應天府人善詩文以鄉貢授龍泉學諭歷
孝豐知縣致仕官無全貲家無留業挈其妻子寓秀水
之醋坊橋懋嘗從南都侍御戴簡庵學乃與其子經
忘年交後以詩歌相唱和往來益密遂相依以居年七
十七以壽卒經爲管葬於大彭之野

兩浙名賢